

## La nestre lenghe

Di in chel dì che il Friûl al è passât sot l'Italie e je scomençade la vuere cuintri la lenghe furlane.

Cualchidun, salacor, la veve nulide ancje prin: tra i patriots dal '48 e dal '59 a'nd jere di chei che no si sporcjavin a fevelâ par furlan. Ma chel al jere afâr lôr: i sfuarç par distudâ la lenghe a son vignûts dopo. A son vignûts di ogni bande: de bande di putrops furlans che a àn tacât a scrivi par furlan inte maniere plui ridicule, par fâ viodi che il nestri lengaç al è fat di peraulis talianis cun cualchi cjonçadure da pît; de bande dai gramatics che si son butâts tant che liparis aduès dal Ascoli - il prin glotolic dal mont - par vie che al veve vût cûr di visâsi che nol jere pussibil meti il furlan tal complès dai dialets talians; de bande de stampe nazionaliste che e jere cjalde di netâ ducj i cincuante mil dialets talians; de bande dal guvier che al dave istruzions segretis di promovi la invasion di funzionaris e mestris "talianis" tal Friûl, par convertî cheste int che no semeave masse contente des tassis sul masanât e de bocjade cuistade pal mont spudant balins.

Cun cheste biele politiche o sin rivâts fintremai ai timps d'aur de farse litorie. In chês volte si è discjadenade une altre bissebove plui furiose di prin. I prefets a mandarin la proibizion a dutis lis stampariis di publicâ ancje une sole rie di furlan e sepi Diu ce vitis che e à fat la Filologjiche a molâ fûr, tra nûi di incens al "guidadôr", chel fregul di "Strolic". Chel nobil sfuei che si publicave cul non di "Giornale del Friuli" al stampave lis sôs intemeradis, une plui dissemplade di chês altre, butadis jù di cuatri temui che di chestis cjossis no vevin mai mastiât nuie.

Dopo, alc al è mudât. Alc, no trop. Dai valorôs cuintri-furlans di chês volte, cualchidun al è lâf fûr dai pîts, cualchidun al à cambiade idee, e cualchidun al à cambiadis, plui di une volte, par vie dal pagnut, dutis lis ideis, mancul chês: si viôt che la opare cuintrifurlane e à simpri rindût e inmò e rint pulît in cualchi cjanton.

E vuê come vuê, a noaltris no nus perdonin di jessi restâts furlans; cuntune nestre muse, cuntune nestre anime - lôr che no àn plui ni anime e ni muse - e cuntune nestre lenghe, che e je il speli di cheste anime. No nus perdonin di molâ fûr cualchidune di chês veretâts che ducj lis viodin e nissun olse dîlis. E alore o disìn a ducj i nestris amîs a ducj i furlans che no àn vendude la anime par une pironade di lidrîs: no si à di molâ!

Se nus rugnin cuintri, al vûl dî che la vin intivade juste. Se nus pochin de bande de lenghe, al vûl dî che a àn capide la sô impuartance; e al è chest il pont indulà che o vin di tignî plui dûr. Coltivâle, doprâle, studiâle, slargjâle, purgâle dai bastardaments, cheste lenghe dai nestris viei e de nestre tiere. E je cheste lenghe che nus fâs sintî dentri vie une anime diferente, une dignitât e une personalitât, denant di cualsisei cragne, foreste o nostrane.

(josef marchet - Patrie dal Friûl / març 1950)